

**Bil. 45**

**Isnin**

**10 Disember 2018**



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGKAL PERTAMA  
MESYUARAT KEDUA**

## KANDUNGAN

### UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Bau Busuk Berlanjutan di Jalan Then Kung Suk,  
Upper Lanang**  
- YB. Puan Alice Lau Kiong Yieng (*Lanang*) [Halaman 1]
- **Cadangan Membaik Pulih dan Menaik Taraf Dua  
Bangunan Sekolah Kebangsaan Methodist  
Sungai Siput**  
- YB. Tuan Kesavan a/l Subramaniam (*Sungai Siput*) [Halaman 4]

**MALAYSIA**  
**KAMAR KHAS**  
**PARLIMEN KEEMPAT BELAS**  
**PENGGAL PERTAMA**  
**MESYUARAT KEDUA**  
**Isnin, 10 Disember 2018**  
**Mesyuarat dimulakan pada pukul 2.30 petang**  
**DOA**  
*[Timbalan Yang di-Pertua (Tuan Nga Kor Ming)*  
*mempengerusikan Mesyuarat]*

---

**UCAPAN DI BAWAH USUL**  
**BERKENAAN PERKARA TADBIR KERAJAAN (P.M. 17)**

**Bau Busuk Berlanjutan di Jalan Then Kung Suk, Upper Lanang**

**2.33 ptg.**

**Puan Alice Lau Kiong Yieng [Lanang]:** Terima kasih Tuan Yang di-Pertua. Tuan Yang di-Pertua, saya telah menerima aduan tentang bau busuk berlanjutan di kawasan Parlimen Lanang iaitu Jalan Then Kung Suk, Upper Lanang. Penduduk-penduduk di kawasan ini telah sering kali melaporkan bahawa pencemaran udara di kawasan sekitar mereka semakin teruk saban hari.

Isu pencemaran udara yang teruk di kawasan Jalan Then Kung Suk, Upper Lanang ini dilaporkan bermula lebih daripada 10 tahun yang lalu. Pencemaran udara yang serius ini dipercayai berpunca daripada kilang-kilang yang terletak berhampiran dengan kawasan perumahan mereka. Aduan telah pun dibuat terhadap salah satu kilang yang terlibat dimiliki oleh *Kinetic Food Processing* Sendirian Berhad. sejak beberapa tahun dahulu, namun masih mengeluarkan bau busuk yang berlanjutan. Hal ini jelas telah menjejaskan kesihatan para penduduk yang tinggal di kawasan ini.

Lebih membimbangkan lagi apabila sebuah sekolah rendah di kawasan ini, iaitu SJK(C) Thai Kwang, dikelilingi oleh kilang-kilang tersebut. Pada awal bulan Oktober yang lepas, seorang pelajar dari sekolah tersebut telah disahkan menghidap penyakit asma berikutan pencemaran udara yang teruk di Jalan Then Kung Suk, Upper Lanang ini. Selain itu, juga dimaklumkan ada segelintir pelajar di sekolah tersebut turut dilaporkan mengalami masalah pernafasan. Oleh yang demikian, saya memohon agar pihak kementerian dapat

memberikan perhatian yang lebih terhadap isu pencemaran udara di kawasan Jalan Then Kung Suk, Upper Lanang ini.

Saya ingin tahu, berapakah aduan tentang bau busuk di Jalan Then Kung Suk yang telah diterima oleh pihak kementerian setakat ini dan apakah tindakan yang telah diambil oleh pihak kementerian untuk mengatasi masalah ini. Memandangkan masih ada lagi aduan yang ditujukan kepada saya, saya berpendapat bahawa mungkin tindakan yang diambil sebelum ini tidak berkesan. Jadi, apakah langkah yang boleh diambil untuk menyelesaikan masalah ini untuk jangka masa pendek dan juga jangka masa panjang. Hal ini kerana, saya percaya bahawa pencemaran udara di kawasan ini dapat dibendung sekiranya langkah-langkah yang drastik dapat diambil demi keselesaan dan kesejahteraan masyarakat sejagat oleh pihak berkuasa. Sekian, terima kasih.

### **2.34 ptg.**

**Timbalan Menteri Dalam Negeri [Dato' Mohd Azis bin Jamman]:** Terima kasih Tuan Yang di-Pertua, terima kasih Yang Berhormat Lanang. Untuk makluman Yang Berhormat, Kilang *Kinetic Food Processing* Sendirian Berhad dan Kilang Sibul *Feedmills* Sendirian Berhad merupakan milik Syarikat KTS Group, Sibul, Sarawak. Lokasi Kilang Sibul *Feedmills* Sendirian Berhad berada di belakang Kilang *Kinetic Food Processing* Sendirian Berhad dan untuk memasuki ke Kilang Sibul *Feedmills* Sendirian Berhad ini perlu melalui pintu utama/masuk *Kinetic Food Processing* Sendirian Berhad. Air basuhan daripada Kilang Sibul *Feedmills* Sendirian Berhad disalurkan ke sistem pengolahan efluen (SPE) milik Kilang *Kinetic Food Processing* Sendirian Berhad.

Bagi tempoh 2008 hingga 2018, Jabatan Alam Sekitar telah menerima 38 aduan bau busuk berkaitan dengan premis tersebut. Tindakan yang telah diambil oleh Jabatan Alam Sekitar merupakan arahan pematuhan ke atas kilang tersebut.

Memandangkan perulangan aduan yang dibuat atas kilang tersebut pihak Jabatan Alam Sekitar juga boleh mengambil tindakan berikut. Dalam jangka pendek, Jabatan Alam Sekitar boleh melakukan penahanan operasi kelengkapan di bawah Seksyen 38(1)(a) Akta 127.

Dalam jangka panjang pula, Jabatan Alam Sekitar boleh memberi pematuhan kepada pemilik premis untuk menambahbaikkan peralatan serta operasi bagi mengurangkan penghasilan bau yang menimbulkan kacau ganggu. Kementerian ini terus komited untuk memastikan kesejahteraan rakyat dan alam sekitar terpelihara. Oleh yang demikian, salah

satu inisiatif baru kementerian ini adalah untuk melipatgandakan operasi pemantauan dan penyiasatan Jabatan Alam Sekitar. Terima kasih.

**Cadangan Membaik Pulih dan Menaik Taraf Dua Bangunan  
Sekolah Kebangsaan Methodist Sungai Siput**

**2.37 ptg.**

**Tuan Kesavan a/l Subramaniam [Sungai Siput]:** Terima kasih Tuan Yang di-Pertua. Yang Berhormat Timbalan Menteri, saya telah menerima satu memorandum daripada Yang di-Pertua PIBG SK Methodist Sungai Siput berkenaan cadangan membaik pulih dan menarik taraf dua bangunan sekolah tersebut. Saya telah membuat lawatan ke bangunan sekolah berkenaan dan berdasarkan pengamatan saya, didapati kekuda bumbung sudah usang dan dimakan anai-anai, atap dan palong hujan yang bocor, siling yang rosak akibat air hujan serta pendawaian dan perkakas elektrik seperti lampu dan kipas yang rosak.

Berdasarkan permasalahan yang diutarakan ini, saya memohon cadangan ini diluluskan untuk menjadikan sekolah ini lebih selesa, selamat dan mampu memberikan perkhidmatan yang lebih baik kepada murid-murid khususnya serta komuniti setempat amnya. Saya memohon Yang Berhormat Menteri, agar memperuntukkan Bajet 2019 bagi membaik pulih dan menaik taraf dua bangunan tersebut yang dianggarkan sebanyak RM500,000. Terima kasih.

**2.38 ptg.**

**Timbalan Menteri Pendidikan [Puan Teo Nie Ching]:** Terima kasih Tuan Yang di-Pertua dan terima kasih Ahli Yang Berhormat. Tuan Yang di-Pertua, Kementerian Pendidikan Malaysia (KPM) ingin menjelaskan perkara-perkara yang dibangkitkan oleh Ahli Yang Berhormat Sungai Siput mengenai Cadangan Membaik Pulih dan Menaik Taraf Dua Bangunan Sekolah Kebangsaan Methodist Sungai Siput.

Tuan Yang di- Pertua, sebelum saya menjelaskan perkara yang dibangkitkan oleh Yang Berhormat Sungai Siput, adalah penting untuk kita memahami bahawa sekolah-sekolah di bawah KPM terbahagi kepada dua jenis iaitu sekolah kerajaan (SK) dan sekolah bantuan kerajaan (SBK).

Sekolah kerajaan merupakan institusi pendidikan yang ditubuh, dibina, disenggarakan dan dibiayai sepenuhnya oleh Kementerian Pendidikan Malaysia (KPM). Manakala, sekolah bantuan kerajaan merupakan institusi pendidikan yang ditubuhkan oleh pihak lain yang

menjadi pemilik kepada tapak atau bangunan sekolah dan hanya menerima sumbangan bantuan modal dan sumbangan bantuan penuh daripada kerajaan yang merangkumi gaji guru dan kakitangan sekolah.

Untuk Makluman Yang Berhormat Sungai Siput, SK Methodist Sungai Siput merupakan sebuah sekolah bantuan kerajaan (SBK). Justeru, penyaluran peruntukan untuk Sekolah-sekolah Bantuan Kerajaan seperti sekolah jenis kebangsaan Cina (SJKC), sekolah jenis kebangsaan Tamil (SJKT) dan sekolah mubaligh diturunkan berdasarkan skop kerja untuk pembinaan, pembaikan, penyelenggaraan, naik taraf, pendawaian elektrik, rawatan anai-anai dan sebagainya.

SK Methodist Sungai Siput pernah menerima peruntukan di bawah Tabung Penyelenggaraan pada tahun 2015, 2016 dan 2017. Peruntukan yang diterima adalah berjumlah RM20,000 bagi tahun 2015, RM26,400 bagi tahun 2016 dan RM60,000 bagi tahun 2017. Manakala peruntukan bagi tahun 2018 adalah berjumlah RM40,000. Jumlah ini ditentukan selepas konsultansi dengan *Federation of Councils of Christian Mission Schools Malaysia* (FCCMSM), dengan izin.

#### ■1440

Pihak sekolah sepatutnya mengemukakan laporan status perbelanjaan bagi peruntukan yang telah diterima kepada pihak KPM. Walau bagaimanapun, pihak sekolah didapati tidak pernah mengemukakan laporan status perbelanjaan peruntukan tersebut. Penghantaran laporan status perbelanjaan tersebut penting bagi memastikan peruntukan yang diberi digunakan dengan betul untuk tujuan seperti penyelenggaraan, penambahbaikan dan juga untuk menyediakan keperluan.

Sehubungan dengan itu, KPM telah mengarahkan semua sekolah yang menerima peruntukan supaya menghantar laporan status perbelanjaan peruntukan bulanan iaitu sehingga peruntukan habis dibelanjakan. Di samping itu, lawatan pemantauan ke sekolah juga diadakan oleh KPM melalui Bahagian Pembangunan Pelajaran dan Jabatan Pendidikan Negeri (JPN).

Tuan Yang di- Pertua, berhubung dengan permohonan untuk membaik pulih dan menaik taraf dua bangunan SK Methodist Sungai Siput, KPM menyarankan supaya permohonan tersebut dikemukakan melalui Pejabat Pendidikan Daerah (PPD) dan Jabatan Pendidikan Negeri (JPN). Ini adalah supaya pihak PPD dan JPN dapat membuat pemantauan dan penilaian anggaran sebenar kerosakan yang dilaporkan dan dimasukkan ke dalam senarai penerima peruntukan penyelenggaraan tahun 2019.

KPM juga ingin memaklumkan bahawa peruntukan penyelenggaraan, baik pulih dan naik taraf sekolah yang akan disalurkan kepada sekolah adalah berdasarkan keutamaan skop kerja yang disyorkan oleh Jabatan Pendidikan Negeri (JPN) dan jabatan-jabatan teknikal seperti Jabatan Kerja Raya (JKR) tertakluk kepada peruntukan tahun semasa yang diluluskan.

Kesimpulannya, KPM sentiasa berusaha untuk menyediakan kemudahan dan fasiliti yang lengkap kepada semua sekolah di bawah KPM tanpa mengira jenis sekolah. Keutamaan KPM adalah menyediakan peluang untuk kanak-kanak Malaysia hidup dan belajar sesama rakan dengan gembira daripada setiap kumpulan etnik, agama, dan budaya bagi mencerminkan kepelbagaian yang wujud di negara ini. Sekian jawapan saya, terima kasih.

**Timbalan Yang di-Pertua [Tuan Nga Kor Ming]:** Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Selasa, 11 Disember 2018.

***[Kamar Khas ditangguhkan pada pukul 2.43 petang]***